

華夷花木鳥獸珍玩考

華夷鳥獸續考卷之十

吳興郡山人愼懋官

鳳凰

博白有遠村號錄含皆高山大水人跡罕及斗米一
二錢蓋山險不可出有小江號龍潛魚大者動長六
七尺癡不識人村民自誇我山多鳳凰吾且謂妄從
而詰之則曰其大如鸞五色有冠率居大木之顛穴
木而巢焉遇矢氣清明必出出必雙飛所過則諸鳥
歛翼俛首而伏不敢鳴者久之吾嘆曰此真鳳凰也
古人謂南方丹山產鳳爲信

見鐵圍山叢談

鶯歌

大紅綠鶯歌五色鶯歌鸚歌皆能效言語出瓜佳國

鸚鵡不敢牽帝衣

明皇時有五色鸚鵡能言上令左右試牽帝衣鳥輒

瞋目叱咤政府文學能延京獻鸚鵡篇以贊其事張

燕公有表賀稱爲時樂鳥見酉陽雜俎

凡鳥三指向前一向後鸚鵡兩指前後

海鸚哥

海鸚哥黑喙綠羽足亦蟹也

桃蟲

桃鵒爾雅曰鷦其雌鵒音艾似黃雀而小一名鷽鷽

一名鷽鷽一名鷽雀俗呼巧婦

見通志昆蟲略

鷽鷽

鷽鷽爾雅曰冠雉郭云鷽大如鴿似鷽雉鼠脚無後指岐尾為鳥慙急群飛出北方沙漠地

見通志昆蟲略

錦地鷽

閩中造盞花紋鷽鷽斑點試茶家珍之因展蜀画鷽鷽于書館江南黃是甫見之曰鷽鷽亦數種此錦地

鷽也

見清異錄

海鷽

海鷗似鷺而大不識人舶過常集人肩頂人輒捕而

烹之

見海語

鶴

鶴一起千里古謂之僊禽以其於物爲壽又性絕警
八月白露降則警而鳴性好在陰故謂其羽爲陰羽
周書曰陰羽鳧旌解者曰鶴鳧羽爲旌也故易有鳴
鶴在陰之文然詩稱鶴鳴于九臯聲聞于天與易之
鳴鶴在陰其子和之若不同者蓋鳴于九臯鶴之俊
者以喻士之及時而未仕者至其老則聲不能揚和
者獨其子而已禽經又曰鶴老則聲下而不能高也

而不能祭此之謂也書又言鶴體無青黃二色者木
土之氣內養故不表於外然本草云鶴有玄有黃有
白有蒼蒼者今人謂之赤頰玄則鶴之老者百六十
年則有純白純黑之異若黃鶴則古人常言之古書
又多言鵠鵠卽是鶴音之轉後人以鵠名頗著謂鶴
之外別有所謂鵠故埤雅既有鶴又有鵠蓋古之言
鵠不曰浴而白白卽鶴也鵠名喈喈喈鶴也以龜
龍鴻鵠爲壽壽亦鶴也故漢昭時黃鵠下建章宮太
液池而歌則名黃鶴神異經鶴國有海鵠衛懿公好
鶴齊王使獻鵠于楚亦列國之君皆以爲玩其餘諸

書又如蕙帳空今夜鶴怨楚辭黃鵠一舉及田饒說
魯哀公言黃鵠或爲鶴或爲鵠者甚多以此知鶴之
外無別有所謂鵠也鶴好延頸以望故稱鶴以怨望
鵠以貪顧怨者必望故以望爲怨不意君之望臣深
是也貪者必顧故以顧爲貪數招權顧金錢是也古
以鶴爲祥故立之華表說文桓亭郵表也一說漢法
亭部四角建大木貫以方表名曰桓表又鶴之滕特
隆故吳矛散大者名鶴滕又作詩者以申字平爲鶴
滕

羊公鶴

劉遵祖少爲殷中軍所知稱之於庾公庾公甚忻然
便取爲佐旣見坐之獨榻上與語劉爾日殊不稱庾
小失望遂名之爲羊公鶴昔羊叔子有鶴善舞嘗向
客稱之客試使驅來氈毼而不肯舞故稱比之

見世說新

海鶴

海鶴大者修項五尺許翅足稱是吞常鳥如鯁魚鱗
成化間有至漳州者漳人射殺之復有以頂負者類
淘汙而銳喙雄大雌乃略小晝啄于海暮宿巖谷間
島夷豫以小鏢付紈月夕則伏於鶴常宿所擇其大

者而刺之平旦有獲五六頭者鳥夷乃剥其頂售于
舶估比至閩廣價等金玉

鶴頂鳥

鶴頂鳥大如鴨毛黑長頸背其腦蓋骨厚寸餘外紅
色裏如黃蠟色嬌黃可愛堪作腰帶

出舊
港國

鶴頂紅

鶴頂出南蕃大海中有魚頂中鮐紅如血名曰鶴魚
故以爲帶號曰鶴頂紅今用龜筒夾鶴魚鮐爲梳名
曰鶴頂梳 佐近在都御史羅通官舍見其鶴頂紅
帶云是海外真鶴頂剪碎紅頂夾打成帶上有細波

紋無紋者卽僞物也又見真鶴頂但兩頰紅頂不紅
大者三個可作一帶

金鳥

廣州記金鳥色純白口與足如金其鳴自呼

信天翁

信天翁鳥名渠中有之其鳥食魚而不能捕俟魚鴈
所得偶墜者拾食之蘭廷瑞詩云荷錢荇帶綠江空
唼鯉含鯊淺草中波上魚鴈貪未飽何曾餓死信天
翁亦可以爲諷也廷瑞滇之楊林人

阿濫堆

張祐詩紅樹蕭蕭閣半開玉皇曾幸北宮來至今風
俗驪山下村笛猶吹阿濫堆宋賀方回曲子云待月
上潮平波灩塞管孤吹新阿濫中朝故事云驪山多
飛鳥名阿濫堆明皇採其聲爲曲子又作鷓鴣堆西
陽雜俎云鷓鴣堆黃一變之鵲色如鷺鵲鵲轉之後
乃至累變橫理細臆前漸漸微白

見丹
鉛錄

燕

燕之居甚安故古以爲燕居燕享之燕然安不可懷
故又有燕安鷄毒之戒至其去也多歲深山大空水
中無毛羽或蟄藏坻岸中

郊鑒遊難澤中百姓
盡饑饉掘蟄燕食之亦云

入水爲蜃蛤淮南子云燕之爲蛤是也今人言蜃是
蛟類吐氣爲臺樓伺燕栖集則食之又言龍食燒燕
水枯竭者投之立漲今人亦投之以求雨人食燕則
不可以適河然則燕與蛟龍蜃蛤之氣相往來蓋亦
類也玄中記曰千歲之燕戶北向燕之來去皆避社又戊巳日不
取土以戊巳字書其巢上則去之豈社主於土戊巳
又土位土克水燕之所避歟說文燕作巢避戊巳

意怠

東海有鳥焉其名曰意怠其爲鳥也紛紛秩秩而似
無能引援而飛迫脅而棲進不敢爲前退不敢爲後

食不敢先嘗必取其緒是故其行列不斥而外人卒不得害是以免於患

見莊子

貞燕烈鴛

元元貞二年雙燕巢于燕人柳湯佐之宅一夕家人舉燈照歟其雄驚墜猶食之雌彷徨悲鳴不已朝夕守巢哺諸雛成翼而去明年雌獨來復巢其處人視巢生二卵疑其更偶徐伺之則抱獨之殼爾自是春秋來凡六稔觀者譁然目爲貞燕成化六年十月淮安鹽城大蹤湖漁人見鴛鴦交飛獲其雄烹之雌戀戀飛鳴竟投沸湯中而死漁人悲其意爲弃炙不食

余稱之曰烈鷺

見雙槐歲抄

海鷺

海鷺大如鳩春回巢於古巖危壁葺壘乃白海菜也島夷伺其秋去以修竿接鏟取而鬻之謂之海鷺窩隨舶至廣貴家宴品珍之

伯勞

伯勞不孝鳥也一名博勞一名伯趙仲夏之月始鳴

佛現鳥

靈大我峰普光殿有佛現鳥狀類鵠鵠飛鳴近人其聲圓轉山僧音爲佛現鳥

念佛鳥

輿地紀勝趙吏君聞念佛鳥有詩云不是學僧初念佛從來念佛指人迷

出叙州府

護花鳥

青城峨眉間往往有之至春則啼其音若云無偷花果髣髴人言云

望帝

寰宇記云蜀之先肇於人皇之際至黃帝子昌意娶蜀人女生帝嚳後封其支庶於蜀歷夏殷周始稱王
首曰蚕叢次曰柏灌次曰魚鳧其後有王曰杜宇

帝九望帝特功德高乃以袞斜爲前門熊耳靈關
爲後戶玉壘峨眉爲池澤時有荆人鰲靈者帝立爲
相後帝因禪位於鰲靈遂自亡去化爲子鵠故蜀人
聞鵠鳴曰是我望帝也

見詩林
廣記

楚鬼鳥

楚鬼鳥一曰亡鬼或云楚懷王與秦昭王會於武關
爲秦所執囚咸陽不得歸卒死於秦後於寒食月夜
人見於楚化而爲鳥名楚鬼

見世豹
古今註

鸛鵒

宋天台黃嚴止等寺觀師畜一鸛鵒常隨人念阿彌

陀佛一旦立死籠中乃穴土而葬之舌端生紫色蓮花大智律師爲之頌曰立亡籠閉渾閑事化紫蓮花也大奇

百舌鳥

出中蜀山谷間毛采翠碧蜀人多畜之一云翠碧鳥善效它禽語凡數十種非東方所謂反舌無聲者往往亦矜鬪至死不解然捕者告羣故惜之不使極其擊云

半知

性最痴重半觔俗呼憨半觔訛呼爲半翅

出宜府鎮

鴛

一名倉庚春時流聲百轉

見廣昌志

倉庚

出谷遷喬之事未見其驗今荊州每至冬月於田畝中得土堅圓如卵者輒取以賣破之則鷦在其中無復毛羽蓋以土自裹伏而土堅勁候春始生羽破土而出然則出谷遷喬之事恐當似此矣

斲木

甬如錐長數寸常斲木食蟲俗言斲善禁法曲爪畫地爲印則穴之塞自啓鼠竊其印施於扃鑰亦可開

見廣
志

鷓鴣

鷓鴣能救水故宿水而物不害鷓能巫步禁虵啄木
遇蠹以背畫字成符而蠹自出鷓有隱巢木鷓鳥不
能見燕啣避戊巳日則巢固而不傾鷓有長水石故
能於巢中養魚而水不涸燕惡艾雀欲奪之則啣其
中

鷓鴣

善捕魚郊生漁家畜而抱之漁人迭守不相離視其
少動即呵止否則自毀其郊矣

見廣
志

十二紅

十二紅羽毛紅褐碧綠相間

雀雀

每歲在且熟是則群至食其實性好聞人捕之裹錢使決勝負間里嘈觀至一雀直數千錢官司惡民贅聚每下符禁叱之

揚

揚白鷹也似鷹尾上白

一本尾長白見崔豹古今註

大都養鷹

古人釋鷹化鳩但以搏擊者爲鷹不搏擊者爲鳩鳩

者鳥之總名也余嘗問司鷹之職者寶赤言鷹之類甚衆唯角鷹黃者以鷹名然用鷹有二種一種兩脚有毛一種兩脚無毛名鷺鷥用鷹鷂有二種海東青名白鷂一種玉爪一種黑爪有鴉鷂有金眼鴉鷂有鬼鷂海東青與金眼鴉鷂皆能以小擊大食天鷺鷥鷂之屬鷂鷹角鷹食獐鹿等獸鴉鷂食鴻鴈鷂鴉鷂鷂之屬鬼鷂食狸兔等獸黃鷹食水鴨雉雞之屬鷂子食斑鳩鴝鵒雀之屬各隨其力以相吞啖其雄者小雌者大雛者易視他禽倉者量力求食故養鷹者喜雛與雌也 養鷹鷂者其類相語謂之呌漱呌

音以表反三館書有味漱三卷皆鷹鷂法度具其
齊之術 鷲鳥雄小雌大度鳥雄大雌小

昔人傳楚文王好獵有獻鷹者神爽殊絕王爲獵
於雲夢置網雲布煙燒張天毛群羽族爭噬競搏
此鷹軒頸瞪目遠視霄漢無搏噬志王顧獻者汝
得無欺余耶其人曰此鷹若但效於鬼雉臣豈敢
獻俄而雲際一物凝翔鮮白不辯其形鷹竦翮而
升轟若飛電湏臾羽墮如雪血下如雨有大鳥墮
地度其兩翅廣數十里博物君子曰此大鵬鷂也
楚王乃厚賞之

見幽
明錄

德政感禽

楊繼宗會郡城饑荒流殍者相踵公憫念旣深遂不行關白司道竟自發倉賑之全活萬計仇家以事報敏與直計將門識韓某補本省督叅諭以方略使之陰拾其短且曰外有論劾而吾居中主之不患其不敗也韓就任卽以擅支倉庫少給多侵爲辭行文按公及展牘忽狂風大作揭牘空中旋繞飛揚不止韓喝庭從持送衆役未及起而蒼鷹數十乘風亂集擒牘飛上或爪或喙牘紙紛然碎矣韓怒曰汝與楊繼宗作說客耶我嘗親至其郡復能阻吾乎遂白巡撫

兩院按查嘉禾方下舟羣鷹復至怒睛奮翅馳逐飛
鳴若詈辱之狀者韓愈怒募兵勇搗之乃者彈弩者
箭網者絲用手雖多而羅繞益眾卒無能退也韓正
思計中一老鷹迅擲而下韓急以手蔽面竟除其紗
冠而去衆鷹亦復爭相爪啄又紛然碎矣韓方駭異
返駕默思事因以寢

見雪志
談異

禽擁行車

季元紘開元初爲好時令賦役平允不嚴而治大有
政聲遷閬川司馬發離百里士民號泣遮路烏鵲之
類飛擁行車有詔褒美之 岑樓慎氏曰二事互觀

則今古一理徵也夫

鴈

自河北渡江南疲瘠能高飛不畏縉繳江南沃饒每至春還河北體肥不能高飛恐爲虞人所獲常啣蘆數寸以防縉繳焉是鴈常在海邊砂上食砂石悉皆銷爛唯食海蛤不銷隨其出以爲藥倍勝餘者

白鴈

北方有白鴈似鴈而小色白秋深則來白鴈至則霜降河北人謂之霜信杜甫詩云故國霜前白鴈來卽此是也

鴈爲民治田

上虞有鴈爲民治田春啣拔草根秋喙除其穢是以
縣官禁民不得妄害此鴈犯則有刑無赦也

見十三
州記

鴈王

鴈王啣果獻雜寶歲經迴尸國有五百鴈爲群侶爾
時鴈王名曰賴吒鴈王有臣名曰素摩時此鴈王爲
臘師捕得五百群鴈皆棄飛去惟有素摩隨逐不捨
語臘師言請放我王以身代之臘師不聽遂以鴈王
獻梵摩曜王鴈王曰惟願大王放一切鴈使無所畏
五百羣鴈在王殿上空作聲時王問言此是何鴈

鴈王言是我家屬王卽施無畏不聽殺鴈

札木言于江罕曰我於君是自翎雀他人是鴻鴈
耳白翎雀寒暑常在北方鴻鴈則南飛就暖耳言
已心堅而他人心不可保也

白鷗

所命白鷗春到家時卽遣人往和平村落遍求馴鷗
實無可得至十月此鳥出食田禾方求五六隻家養
以俟其性馴但野鳥入籠常起山藪之恩難獲生全
只有一隻卽欲附來因心翁行道適無海船入省今
姑寄養沈父母衙內候人便順送得來春因詢和邑

之人道此鳥湏如子雞大時取來家什群雞中熟養方得飲啄自如非旦夕可致者

鵲

鵲能鵲鵲鵲之所在鵲必反腹而受啄焉或在木上鳴鵲伏不能行淮南曰鵲矢中鵲此類之不推者也

烏

孔子曰烏呼也取其助氣故以爲烏呼蓋烏之呼如人之歎聲故古者記人之歎輒書烏呼以記之又謂之於戲於耶古烏字穆天子傳曰於鵲與處是也戲卽呼也古者言日中有烏堯時十日並出羿射落

九鳥蓋日以此人主傳曰天無二日土無二王少皞之衰九黎亂德堯出而平之故以喻射九鳥焉

朝夕鳥

成帝時御史府中列栢樹常有野鳥數千栖宿其上晨去暮來號曰朝夕鳥

鴟梟

鴟梟食毋眼睛乃能飛

鶡

鶡爾雅曰天雞鶡首汗逸周書曰蜀人獻文鶡文鶡者未翬雉按今有吐錦雞蓋雉類惟蜀中有之仰日

吐錦甚有文彩

見通志
昆蟲略

真珠雞

真珠雞生夔峽山中畜之甚馴以其羽毛有白圓點故號真珠雞又名綬雞生而反哺亦名孝雉每至春夏之交景氣和煖頷下出綬帶方尺余紅碧鮮然頭有翠角雙立良久悉斂於喙下披其毛不復見或有死者割其頸臆間亦無所覩若溪漁隱曰廣右閩中亦有吐綬雞余在二處見人多養之不獨巴峽中有也

火雞

火雞大如鶴身頭頸長有軟紅冠江涓樣二片生於頸中鶴嘴渾身如羊毛青色如鶴脚爪甚利好食火炭遂名火雞用棍朴擊莫能死

出舊港國

火雞山鳳

火雞出蒲刺加山谷大如鶴多紫赤色能食火吐氣亦煙燄也子如鶩胎殼厚踰重錢或玳或白島夷採爲飲盞見者多珍奇之山鳳喙首如鶴項足率七八尺翅翮過之能吞衆鳥敵人而啄其腦若刀斧然子大如柳甌近時暹羅哪嚙挾一以餉盤檢悅之倩巧匠裁爲酤瓠市井誇謂僅見也

駝雞

山中亦出駝雞土人捕捉來賣其身區頸長如鶴脚高三尺餘每脚只有二指毛如駱駝喫菜菔等物行似駱駝卑峰雙峰俱有人皆騎坐街中亦殺賣其肉

出祖法

兇國

鶉雞

余通海湖中有鳥名曰鶉雞金頂紅嘴其色類鴉其形類鷺每來於三月初三日以前而去於九月初九日以前香脆柔美其味甲于水陸之鳥雖骨亦可嚙而啖之亦南中之信鳥食品之珍奇者也先階宦吾

土者寄詩於家君輩有云康郎不入湖大頭不入海
十年萬里滇雲夢惟有鷓鴣雞沒處買康郎大頭亦二
魚名此鳥來則夜至群飛之聲如雷去則不食諸物
但於洲渚間淘沙而食欲其體輕瘦可高舉以避網
繳

杉雞

杉雞黃冠青綫常在於樹下

竹雞

聲若云姑惡相傳懶婦死姪姑而化

雞

雞或乙丙夜輒鳴者俗謂之盜啼云行且有赦蓋海中星占云天雞星動爲有赦故後魏北齊赦日皆設金雞搗干竿至今猶然亦曰盜啼爲有火

海雞

海雞毛色如家雞惟雙足鰓類爾

南郡鷺

相南郡小兒時與諸從兄弟各養鷺共闕南郡鷺每不如甚以爲忿廼夜往鷺欄間取諸兄弟鷺悉殺之既曉家人咸以驚駭云是變怪以白車騎車騎曰無所致怪當是南郡戲耳問果如之

見世說新語

桑飛

肖雞綠衣繡眼

謾畫

瀛之水有鳥曰謾畫類鴛奔走水上不問水腐泥沙
必啜啜然盡索之而後已無一息少休

鷓鴣

方言鷓鴣鳥似雞五色冬亦無毛常赤裸晝夜常鳴好
自低昂

萬鴨

桂林記曰富楊庭窰山鴨萬隻每飼以米五石遺毛覆

地

政和間川人楊傑朝散知齊之長清縣其家鵬卵
破之得一物長寸餘如人形作男女相屈一足眉
目口鼻手足腰腹悉具被髮垂頸乃腊之既枯而
脇骨莖莖皆隱起與人無異亦怪矣

見四十一家小說

五鳩

嚴氏曰左傳郊子五鳩備見詩經睢鳩氏司馬此睢
鳩是也祝鳩氏司徒鵲鳩也四牡嘉魚之鰓是也鴈
鳩氏司空布穀也曹風之鴈鳩是也爽鳩氏司寇大
明之鷹是也鵲鳩氏司事鸛鳩也卽小斑鳩小宛之

鳴鳩與氓食桑甚之鳩是也左傳睢作鳴杜預云摯而有別故爲司馬主法則鷓鴣音骨鷺音學

睢鳩死別

北湖嚴君問察友楊古崖泊舟瞿塘舟子獲一睢鳩厥偶匝舟鳴號不已將烹之飛者隨投沸釜同絕時同舟者共讓舟子而授二睢鳩于江

見芸心聞見錄

鳩

八十九禮有加賜玉杖長尺端以鳩鳥爲飾鳩者不噎

知禽鳥語

元時有麥宗者通安州麼些人生七歲不學而識文字偶入玉龍山中見石盎中水飲之遂知禽鳥之語一日羣鴉在林有雅南來哀鳴甚急群鴉從之哀鳴宗曰此雄鴉爲白沙里人所弋迹之果然長而百蠻諸夷之書無不通曉鄯闡國稱爲異人云

見麗江府雜志

余讀夷隸職掌與鳥言貉隸職掌與獸言介葛盧來朝聞牛鳴曰是生三犧皆用矣東方介氏之國其國人數數解六畜之語者梁典廷尉沈僧照嘗出獵中道而還左右問故答曰向聞南山虎嘯知國家有邊事須還處分俄而使至益部耆舊傳楊

宣爲河西太守行縣有群雀鳴桑樹上宣謂吏曰
前有覆車粟此雀相隨欲往食行數里信然魏志
管輅在安德令劉長仁許聞雀鳴閣屋上曰雀言
東北一婦昨殺夫牽引西家人日在虞淵告者至
矣到時告者果至宋史孫守榮嘗出入丞相史嵩
之門一日值庭鵲噪守榮曰來日晦時當有寶至
及期李全以玉柱斧爲貢遼史太宗時宗室人名
神速姑者能知蛇語成子名武丁吾鄉人神仙傳
載其在長沙異人授以一書遂通天下鳥語獸音
翰斧名談時近清明將吏驅羊二十餘頭後二羊

鞭之不動太守問羊不行有說乎曰羊言腹有羔
將產然後就死守乃留羊一月餘果生子高緯貽
略和菟有鳥鳴書一卷王喬有解鳥語一卷若詹
何廣漢翁偉之事不可勝書未嘗不如嵇中散所
見也及展雲南一統志覽麥宗之故事方信傳史
垂後未嘗少欺而以牛鳴爲先儒妄說者抑陋矣

五鳥叙倫圖

白都憲公以周詩內鳳鳴高岡鶴鳴子和鶴鳴在原
睢鳩在洲鳥鳴嚶嚶爲有君臣父子兄弟夫婦朋友
之義繪爲一圖命之曰叙倫系之以詩曰名稱各異

羽毛殊物性天成自可娛世降道微風俗薄安能家有叙倫圖

禽經云風翔則風雨舞則雨霜飛則霜露翫則露風鳶類霜鷗鷯也露鶴也皆禽名雨則霜羊獸也四名甚奇

麒麟

麒麟前兩足高九尺餘後兩足高八尺長頸擡頭高一丈六尺首昂後低人莫能騎頭生兩短肉角在耳邊牛尾鹿身蹄有三路圖口食粟苴麴餅

僂耳

周末昌中涪州多虎暴有一獸似虎而絕大這一虎
噬殺之錄奏檢瑞應圖乃酋耳也不食生物有虎則
殺之見朝野
僉載

海犀

海犀間出海上類野兕而額鼻有角與陸犀同所遊
止處水爲分裂夜則淵面白光熒熒此其異也島夷
以是候之然竟無獲者遂爲希世之物矣舊說溫嶠
燃犀照水神怪莫遯卽其角也錢吳寶庫有水犀帶
一具國亡流落人間不知所終云又野犀有名通天
者角表夜光如炬亦奇物也見海
語

犀角

其犀角如水牛之形大者有七八百觔滿身無毛黑色俱是鱗甲紋瀨厚皮脊有二路有一角生於鼻梁之上長一尺四五寸不食草料惟食刺樹葉并指天乾木拋糞如染坊蘆黃色

象

象嗜稼凡引類于田必次畝而食不亂蹂也未旬卽數頃盡矣島夷以孤豚縛籠中懸諸深樹孤豚被縛喔喔不絕聲象聞而怖又引類而遁不敢近稼

見海語

獅子吼

肇曰獅子吼無畏音也凡所言說不畏群邪異學論獅子吼衆獸下之獅子吼曰美演法也

獅子筋爲琴絃其聲一奏一切餘絃悉斷取牛羊驢馬諸乳置一器中若將獅子乳一滴投之一

切諸乳悉化爲水

見安樂集

黃丈鬼

異苑廣州治下有鬼山則爲祟皆着黃衣至人家張口而笑必得疫雙魂集香山深林中往往有物如嬰兒而裸自藤蘿中携手息貫而下相挽不斷見人輒笑至地而滅土人呼爲赤蝦亦無所怖予親見

之

草上飛

草上飛番名昔雅鍋失有犬犬之形渾身儼似玳瑁斑貓樣兩耳尖黑純不惡若獅豹等項猛獸見他卽伏於地乃獸之王也

猓然

段氏蜀記出戎州蠻界其皮宅褐石三色相間

猓然死難

有獸名猓然似猴而差大行則大者前小者後有射中者則生者墜死者箭自刺而死可謂仁義之獸

見夷堅
續志

騊

騊爾雅云騊如馬一角者騊音攜郭云元康八年
九真郡僚一獸大如馬一角角如鹿茸此卽騊也今
深山中人時或見之亦有無角者

見通志
見輿略

七名馬

秦始皇有七名馬追風白毛騊景奔電飛翾銅雀晨

鳧

見崔豹
古今註

五花馬

唐詩朝騎五花馬又五花馬千金裘杜詩蕭蕭千里

馬箇箇五花文隋丹元字步天歌五箇花文王良星
馬鬣剪爲五花或三花皆象天文王良星義也白樂
天詩馬鬣剪三花唐六典云外牧歲進良馬印以三
花飛鳳之字

見丹鉛餘錄

馬之爲物最神駿故古之詩人畫工皆借之以寄
其精工若杜工部蘇東坡諸詩極其形容殆無餘
巧余又愛杜公作九馬贊云姚宋廟堂李郭治兵
帝下毛龍以馭群英何其雄偉也李燾長編載元
祐西域貢馬云龍顧而鳳膺虎脊而豹章振鬣長
鳴萬馬皆瘖句亦奇矣

叱撥

唐詩紫陌亂嘶紅叱撥叱撥馬名宋群牧判官王明
上群牧故事六卷中載九龍十驥之名西河東門之
骨法無不具焉其說馬之毛色九十一種又云叱撥
之別有八曰紅耳叱撥曰鴛鴦叱撥曰桃花叱撥曰
丁香叱撥曰青叱撥曰啗叱撥曰榆叱撥曰紫騮叱
撥又曰北方馬以叱撥及青白紫純色綠鬃騮爲上
驄赤驃騊白赤色爲中荏駟騄駼駮爲下

相馬經

耳欲銳而小如削筒

鳳臆龍髻

言馬面目如鳳馬鬣如龍真良馬也

山馬

形如鹿差黑二角眼下復有一眼日閉夜開以燭物

海馬

海馬色赤黃高者八九尺逸如飛龍山食而宅海蓋
龍種也東南島夷老於泛海者聞一見云見海語

海馬骨

徐鉉仕江南日嘗至飛虹橋馬不進以問杭僧贊寧
寧曰下必有海馬骨水火俱不能毀惟溷以腐糟隨
毀者乃是鉉斲之得巨獸骨試之果然鐵碓鍛金銀
百十年不毀以椎皂角則一夕破碎鞭捶馬愈久愈

潤以擊犬隨卽折裂

凡欲鐵器破拆以鋼沙夾鹽
滿卷之一晝時其鐵則酥軟

海驢

海驢多出東海狀如驢舶估有得其皮者毛長二寸

許晴則斃耗下垂陰則斃練整整也或以製卧褥善

人御之竟夕安寢不善人枕籍魂乃數驚矣島夷詫

其靈不敢蓄也

凡海語

兕

爾雅曰兕似牛青色重千觔一角長二尺餘形如馬

鞭柄其皮堅厚可制鎧

見通志昆蟲略

牛

禮曰一元大武其聽以鼻

海邊山內野水牛甚狠但見生人身穿青者必趕

來抵觸而死

出占城國

相牛經

牛岐胡壽

岐牽兩腋下分為三

眼去角近行駛眼欲得大眼中

有白脈貫瞳子行最快頸骨長且大壁堂欲得濶

脚

間也蹄欲得如縱馬

馬繫而去也

膺庭欲得廣

膺

天關欲得

成

背接骨

雋骨欲得垂

脊中央欲得下

蘭株欲得大

尾

豐岳欲

得大

膝

種頭欲得高百肱欲得緊垂星欲得有怒肉

蹄上巴肉怒肉蹄間名怒肉

力性欲得大而成

當車骨也

懸蹄欲得如八

字陰虹屬頸

陰虹者有雙筋白尾骨屬頸

陽鹽欲得廣

陽鹽者夾尾林前

常有聲似鳴者有黃也洞胡無壽珠淵無壽

也上池有亂毛妨主

角中夾也

身欲得促形欲得如卷

大膝踈肋難飴龍頭突目好跳豪筋欲得成就

脚後橫筋

毛欲得短密若長踈不耐寒氣尾不用至地尾毛少

骨多者有力膝上肉欲得緊用欲得細鼻如鏡則難

牽口方易飴滌府方易飴水牛肚大尾青最有力

竹牛

西夏有竹牛重數百斤角甚長而黃黑相間用以製

弓極佳尤且健勁其近圯黑者謂之後醮近稍近圯

俱黑而方面黃者謂之玉腰夏人常雜犀角以市焉
人莫有知往時鎮江裨將王詔遇有鬻犀帶者無他
文但峰巒高低繞人腰圍耳索價甚高人皆不能辨
惟辛太尉道宗知此竹牛也爲弓則貴爲他則不足
道耳

及牛

玄中記大月交及西域胡有牛名曰及牛今日割取
其肉三四觔明日其肉已復創卽愈也葉文莊盛水
東日記莊浪有饗羊十人歲取其脂非久復滿腹蓋
地接西蕃偏方氣使然爾文莊嘗官陝西所言必其

所見春使節經武威時恨不及詢之饗羊可與及牛對葉

角端

元太祖西征至印度遇大獸其高數十丈角如犀牛作人語曰此非帝世界宜速還耶律楚材進曰此名角端乃旄星之精也聖人在位斯獸奉書而至日馳萬八千里靈異如鬼神不可犯也

見宛委餘編

神鹿

神鹿大如巨猪高二尺許前半截甚黑後半截白花毛純可愛嘴如猪嘴不平四蹄如猪蹄脚有三路止

食草木不食腥

福鹿

福鹿如騾之樣一身白面眉心細細青條花起滿身至四蹄條間通如畫青花白駝雞如福祿一般

由鹿哀類

正元丁卯歲予南出檣樊之間遇野人繫鹿而至者問之答曰此爲由鹿以此鹿以誘至群鹿也備言其狀且曰此鹿每有所至輒鳴嗥不食者累日余喟然嘆曰虞之卽鹿也必以其類致之人之卽人也亦必以其友致之實繁有徒古之然矣嗟乎鹿無情而猶

知痛傷人之與謀實安殘酷者彼何人斯彼何人斯

見呂溫山鹿賦序

鹿女

雜寶藏經鹿女夫人緣雪山邊有一僊人名提婆延
是波羅門種常墮石穴有一雌鹿來舐小便卽有娘
生一女子華嚴其身旣能行腳踏地處皆蓮花出婆
羅門法夜恒宿火偶值一夜火滅至他處會從乞火
他人見其蹟有蓮花得火還值烏提延王遊獵見彼
舍人有七重蓮花王怪而問卽答王言山中梵志女
見是女妹妙語仙人云與我此女王遂立爲夫人王

大夫人甚妬鹿女其後不久生五百卵

星虎

山出星虎如中國之虎略大其毛異色亦有暗色花紋黃虎亦內有虎變人入市混人而行自有識者擒而殺之

出蒲刺加國

飛虎

山林中出一等飛虎如猫之大遍身毛灰色有肉翅如蝙蝠翅一般前足肉翅生連後足能飛不遠人或

有裝得者不服家食即死

出啞魯國

榜葛刺國有一等人同其虎坐於地其人赤體卑

稍對虎跳躍拽牽拳將虎踢打其虎性發作威叫
噉勢猛其人與虎對陣數次其人又以手拳頭伸
入虎口直至喉亦不咬他戲畢仍鎖虎頭虎伏於
地討食其家則以肉啖之及賞錢物去

忽魯謨斯國忽魯波斯國其羊有四樣一等大毛
綿羊每箇重七八十觔尾長二尺一等開羊高三
尺前半截毛拖地後半截皆剪淨其頭面似錦羊
角灣轉朝前上帶小鐵牌行動有聲此羊快聞好
事之人喂養在家鬪賭財物爲戲

龍虎相持

南武選楊次泉嘗云安陸陂澤中多巨林叢葦水涸則虎豹處其中一日鄉人遙見一虎倒懸於樹聲震林木集衆視之廼一巨鼃曝日于樹虎不知以尾掉之爲鼃所含搏攫不能脫遂爲衆所得

見芸心聞見錄

二虎拾柴

鄭思遠少爲書生善律曆候緯晚師葛孝先受正一法文三皇內文五嶽真形圖太清金液經洞玄五符入廬江馬迹山居仁及鳥獸所住山虎生二子山下人格得虎母虎父驚逸虎子未能得食思遠見之將還山舍養飼虎父尋還依思遠後思遠每出行乘騎

虎父二虎子負經書衣藥以從時於永康橫江橋逢
相識許隱具煖藥酒虎卽拾柴然火隱患齒痛從思
遠求虎鬚欲求熱挿齒間得愈思遠爲之拔之虎伏
不動

見真僊體
道通鑑

良逸常日負兩束薪以奉母或自有故不及往卽
弟子代送之或傳寺衆晨起見一虎在田媪門外
走以告媪媪曰毋怪應是小師使致柴耳

見語
林

山東無虎浙江無狼廣東無兔蜀無鴿

說虎軒

東吳都印曰宋鄉先生范文穆公愛談虎事嘗構一

軒榜曰說虎

獬

圖經本草云黔蜀中有獬土人山居鼎釜多爲所食其齒骨極堅以刀釜椎鍛鐵皆碎落火亦不能燒人得之許作佛牙佛骨以誑俚俗然舂未聞畢竟何物可制之也

龍羊

出吐蕃及威茂州形似畜羊而大其角繚上重八九兩黑質而白文工以爲帶胯其用亂犀

麀羊

出盧氏埤雅曰麀羊類羊青而大其角長一二尺有節如指極堅勁夜則懸角木上以防患語曰麀羊掛角此之謂也今用之以角有掛痕者良

山獺

世傳補助奇僻之品有所謂山獺者以少許磨酒飲之立驗然本草醫方皆所不載止見桂海虞衡志獺性淫毒山中有此物凡牝獸悉避去獺無偶其骨能解箭毒殺死者功力劣抱木枯死者土人自稀得周子功嘗使大理經南丹州卽此物所產之地其土人號之曰插翹一枚直黃金數兩私貨出界者罪至死

方春時徃女數千歌嘯山谷以尋藥挑菜懶爲事性
淫或聞婦人氣必躍升其身次骨而入牢不可脫因
扼殺而藏之土人驗之之法每令婦人摩手極熱取
置掌心以氣呵之卽趯然而動蓋爲陰氣所感故耳
人得其一則立可致富中州多僞以猴胎鼠璞爲之

猫牛

北人嘗云猫不過楊子江言猫過金山則不復捕鼠
厭者至金山剪一紙猫投水中則不忌南人嘗云牛
不過嘉興金牛橋過者卽死厭者牽之涉水而渡則
不忌牛未嘗驗猫則於韓克贊兄處嘗汝寧帶回一

猶過江果不捕鼠一古亦有云鴈鵠不渡濟橋不渡
淮於此事頗同

猫

鼻常冷夏至一日煖日暮目睛圓午歛如線

獬獬

寰宇記戎州夷地獬獬似猿而四足短一騰一百五

十步迅如鳥飛

出叙
州府

金線猿

元周公謹癸辛雜志舉言之云武平素產金線猿大
者難馴小者其母抱持不少置法當先以藥矢斃其

母母既中矢度不能自免則以乳汁遍灑林葉間以飲其子然後墮地死邑人取其母皮痛鞭之其子亟悲鳴而下束手就獲蓋每夕必寢其皮而後安不則不可育

爪哇國其港口有一州林木深茂有長尾獼猴萬數聚止於上有一黑色老雄猴爲主脚一老番婦人隨側其國中婦人無子嗣者備菓酒飯餅之類往禱於老猴喜則先食物餘令頑猴食爭奪食盡其物卽有雌雄二猴來前交感爲驗此婦回家卽便有孕否則無孕也甚爲可奇

狻猊

多融山有物似獼猴長七尺能人行健走名曰狻猊
一名馮化同行道婦人有美者盜之

跳兔

契兔北境有跳兔形皆兔也但前足纔寸許後足幾
一尺行則用後足跳一躍數尺止則蹶然仆地生於
契丹慶州之地大漠中予使虜日捕得數兔持歸蓋
爾雅所謂麋兔也亦曰蛩蛩巨駝也

竹兔

竹兔小如野兔食竹葉

贐

贐有力贐呼犬反郭云西海大秦國有養者似狗多
力獷惡見通志
見蟲略

木狗

木狗形如鬼車能登木其皮可爲衣褥能運動人身
氣血昔聞世皇有足疾取其皮爲褥故人貴之也

至正二十一年昆明縣玉案山下產赤小犬色如

火羣吠遍野

見永昌府雜志

海狗

海狗純黃形如狗大乃如猫嘗羣遊背風沙中遙見

船行則沒海漁以技獲之蓋利其腎也醫工以爲卽
膈肭臍云按本草膈肭出西戎豕首魚尾而二足圖
經云黃毛三莖一竅恐別種也

見海語

天鐵熊治盜

唐高宗時伽毗葉國獻天鐵熊大如狗蒼色作聲諸
竅皆沸能擒白象獅子虎狼

音陞臂骨也
也肢也

熊膽

出太行山詩義疏曰熊能攀援上樹見人則顛倒投
地而下圖經云膽味極苦古人和丸以自刻勵卽此
也

玉面狸

玉面狸謂之風狸止食山果而乘風過枝甚捷味獨勝他狸宜糟食尤佳

文狸

楚辭九歌乘赤豹兮載文狸王逸注云神狸而不言其狀按山海經竄爰之山有獸焉狀如狸而有髦其名曰類自爲牡牝余在大理常見之其狀如狸其文如豹土人名曰香髦疑卽此物也星家衍心星爲狐二十八宿真形圖心星有牡牝兩體其王逸所謂神狸之說乎

有藥者遊行浮沉有若處淵其一者已熟而可噉植
問之可試否其言是藥去此萬里非自行不能得也
按抱朴子書礬石一把內活魚口與無藥俱投沸膏
中猛火之上其術藥者浮戲澆溜不死無藥者已就
糜爛二公皆以此明僊家服食之効也礬石今在處
有之未試而并必欲取於萬里外豈非礬之類耶

馬鮫魚

海山國

馬鮫魚切成手臂大塊淡晒乾倉屋收貯各國亦販
買他處賣之名曰溜魚

抱石魚

出於山溪背偃而腹平其大如指常貼於石上士人
取之爲腊出建寧府

楓葉魚

海物異名記海樹霜葉風飄浪翻腐若螢化厥質爲

魚故名楓葉魚

出興化府

海貳

溜山國

海貳被人採積如山淹爛內肉轉實暹羅榜葛刺國
當錢使用

苟印

狗母蛇主註膏滴耳令左右洽治久聾

山猪卽豪猪身有棘刺

馬八尺爲駮 狗四尺爲獒 彘五尺爲貍

羊六尺爲羴 牛七尺爲特

華陽洞小兒化爲龍

茅山隱士吳綽素擅潔譽神鳳初因採藥於華陽洞
口見一小兒手把大珠三顆其色瑩然戲於松下綽
見之因前詢誰氏子兒聶忙入洞中綽恐爲虎所害
遂連呼相從入欲救之行不三十步見兒化作龍形
一手握三珠填左耳中綽素剛膽以藥斧斲之落左
耳而三珠已失所在龍亦不見出不十餘步洞門閉

矣綽後上皇封素養先生此語賈宣伯說

見龍城錄

魚舅

魚舅味極佳惟嘉州有之

鵞毛魚

東海集鵞毛魚不用網罟夜二人乘一小艇張燈艇中魚見燈光輒上艇須臾而盈多則滅燈否則艇不能勝矣

鼠鮎

黎暹鼠鮎說海有魚曰鼠鮎善食鼠每揭尾沙際以給鼠鼠見之以爲彼且失水矣舐其尾將食之鮎條

轉首厲齒撮鼠入水以去狼藉其肉羣蝦皆食之夫
穴厓巢屋者鼠也居高者潛淵泳潭者鮎也處下者
也嚮使居高者食以其位而不下求其可免矣今若
是悲夫

鯉魚

曹植記其始言取鯉魚一雙令一含藥俱投沸膏中
有藥者遊行浮沉有若處淵其一者已熟而可噉植
問之可試否其言是藥去此萬里非自行不能得也
按抱朴子書礬石一把內活魚口與無藥俱投沸膏
中猛火之上其銜藥者浮戲澠澠不死無藥者已就

縻爛二公皆以此明仙家服食之効也樊石今在處
有之未試而甘必欲取於萬里外豈非譽之類耶

妾魚

古者一國嫁女同姓二國媵之儀禮有媵爵謂先飲
一爵後二爵從之也楚辭魚鱗一兮媵予江海間有
魚遊必三如媵隨妻先一後一人號爲婢妾魚唐詩
江魚羣從稱妻妾塞鴈聯行號弟兄

馬鯪魚

馬鯪魚切成手臂大塊淡晒乾倉屋收貯各國亦販
買他處賣之名曰溜魚

出溜山國

抱石魚

出於山溪背偃而腹平其大如指常貼於石上士人

取之爲腊

出建寧府

楓葉魚

海物一名記海樹霜葉風飄浪翻腐若螢化厥質爲

魚故名楓葉魚

出興化府

班

野池中多有之鱗頗粲露故云春月孕子常數千百

輒自食之殆盡留二子

戴帽魚

安南國有一種魚銳首無鱗有骨若插箭然味似河豚名戴帽魚

海鯊

鯊有二種魚麗之鯊蓋閩廣江漢之常產海鯊虎頭鯊體黑紋鱗足巨者餘二百斤嘗以春晦陟於海山之麓旬日而化爲虎惟四足難化經月乃成矣或曰虎紋直而踈且長者鯊化也炳炳成章者常虎也

鯨魚

出蜀江背鱗黑而膚理似玉蜀人以爲鱠味美

沙綠魚

魚之細者生隈瀨中狀若鮓大不五寸美味蜀人珍之

麥魚

其形銳小似麥可愛縣四十里上溪潭出遡流至石人瀨下形漸大越此則化蜻蛚飛去里人最珍之

見東

流縣志

王鮪

王鮪魚名也居山穴中長老言王鮪之魚由南方來入此穴中入河水見日目眩浮水上流行七八十里釣人見之取之以獻天子用祭其穴在河南小平山

油魚

油魚穴在州南二十里中秋則魚肥長僅二三寸十

月望則絕

見雲龍州志

龍王兵

普河魚池在趙州東北五里池中多魚人不敢捕云

龍王兵也

見雲龍州志

蟹志

蟹始窟穴於沮洳中秋冬交必大出江東人云稻之
登也率執一穗以朝其魁然後從其所之蚤夜感沸
指江而奔漁者緯蕭承其流而障之曰蟹斷

銕斷短

其江之道焉爾然後板授越軼遜而去者十六七
入于江則形質寔大於舊自江復趨于海如江之狀
漁者又斷而求之其越軼遜去者又加多焉既入于
海形質益大海人亦異其稱謂矣

見唐甫里文集

百足蟹

善苑國出百足蟹長九人四螯煎爲膠謂之螯膠勝
鳳喙膠也

章舉

亦呼章魚足長數寸獨二足長尺許而各密綴肉如
白白吸物絕有力能就淺水狎死鳥信而喙之則舉

其足以取螳螂尤苦其毒遇海壽急以長足白碇石
自固今之船碇效焉墨魚雖類有骨亦不解攫烏但
欲有趨避哄墨涵水自隱則同

見陽江縣志

海扇

海中有甲物如扇其文如瓦屋惟三月三日潮盡乃
出名海扇

羸

羸之類多爾雅云羸小者蛄郭云螺大者如斗出日
南漲海中可以爲酒杯按今所謂鸚鵡杯者出南海
蚌

蚌之類多爾雅云蜃小者珧卽小蚌也一名玉珧可
飾佩刀削詩傳云天子玉琫而珧琕是也山海經激
女水中多蜃珧今廣州東南道極多人取以摩作碁
子鬻之

見通志
昆蟲略

苟印

狗母蛇主註膏滴耳令左右洽治久聾

西施舌

一名西施舌中有小鱗產番禺沙灣海嶺表錄異海
鏡二殼相合以成形者外圓而中甚瑩潔中有紅鱗
子饑則蟹出拾食鱗歸腹則海鏡亦飽恐亦沙螺之

類也 予寓漳浦見之形似蜥蜴以爲外圓者誤也

神鰐

天聖元年州漁人得之海中長三尺餘前二鉗二寸許末有紅鬚尺餘首如數升器若繪畫狀雙目十二足文如虎豹大率五彩皆具而狀魁梧尤異中使吳仲華繪其象以聞詔改名神鰐晏元獻公賦其事

集

見文

瑯玕

瑯玕龜類也出廣南身似龜首背如鸚鵡腹背甲皆有紅點斑文大者如盤

應郡曰瑯玕雌曰瑯玕

伊尹請正西

以神龜爲獻正商以璚珉爲獻 白多黑少者價高
但黑斑多者不爲奇

海貳

海貳被人採積如山淹爛內肉轉賣暹羅榜葛刺國
當錢使用出諸山國

貝

貝至徑尺則寶也狀如赤電墨雲謂之紫貝素質紅
黑謂之朱貝青地綠文謂之綬貝黑文黃畫謂之霞
貝此衆愈疾朱明目綬消氣障霞伏蛆蟲黑白各半曰
伏貝使人寡欲無以近婦人黃唇點齒有赤駁曰濯

貝使人善驚無以親童子赤帶通脊曰瞬目使胎消
毋以近孕婦赤熾肉慙赤絡曰彗貝使人健忘赤鼻
青脣曰營貝使童子愚女人淫脊上有縷句脣曰碧
貝使童子盜赤中圓曰委貝使人志強右見相貝經
愛月齋叢抄以不見此經爲恨故記其數端

見魏苑
唐言

塢宮

嚴助相貝經曰堯懸貝轂於塢宮貝轂以貝飾轂也
塢宮他書亦未見

綠毛龜

背有綠毛浮水中則泛起厠置壁間數年不死能辟

飛塵至冬多悶死 大晉龜鼈之屬純雌而無雄

金龜子

俗呼紅娘五六月生于蔓草上大於榆莢細視其帖
金龜子行則成雙死則金色隨滅如螢失火亦有具
五色者外方作下氣強陰之用收以養粉與粉相宜

海鰱

淳熙五年八月出於寧海縣鰱塘港乘潮而上形長
十餘丈皮黑如牛楊髻鼓鬣噴水至半空皆成烟霧
人疑其龍也潮退閤泥中不能動但睛嗒嗒然視人
兩日死識者呼爲海鰱爭食其肉煎爲油以其脊骨

作曰自是海濱人多患疥焉

見赤城志

海鱗

海鱗長者亘百餘里牡蠣聚族其背厠歲之積崇十許丈鱗負以遊鱗背平水卽牡蠣崕岼水面如山矣船猝遇之如當其首輒震以銃砲鱗驚徐徐而沒猶漩渦數日船顛頓久之乃定人始有更生之賀

讀書蟆

余曾見一胡僧持竹器畜蝦蟆數十于中備寸卓數面名之曰讀書蟆每命之讀設一席于上若僧席然左右各設弟子席鼓之坐一巨蟆蛸于師座羣蟆隨

列弟子位鼓之讀則蟆師先聲群弟子應聲而鳴宛
若一堂書聲也鼓之止鼓之入則巨者先止先入
鼃

背青綠色韓昌黎詩云一夜青鼃鳴到曉卽此又有
黃文者謂之金線鼃

蟾蜍

埤雅云吐生腹大背黑皮上多排磊跳行舒遲其肪
塗玉則軟刻削如蠟本草所謂能合玉石者也又曰
蝦蟇一名蟾蜍蓋蝦蟇背有黑點身小能跳接百蟲
善鳴與蟾蜍不類 萬歲蟾蜍頭上有角額下有丹

書八字體重

負蟄

春秋嚴公二十九年有蜃劉歆以爲蜃負蟄也劉向以爲非中國所有南越盛暑男女同川澤淫風所生是時嚴取齊淫女爲夫人旣入淫於兩叔故蜃至按負蟄中國所生不獨出南越

見史通

蜂

蜂純雄無雌在房只呪而化其尾有刺獨爲王者

之

見列子山義

蜘蛛

海蜘蛛巨若丈二車輪文具五色非大山深谷不伏也遊絲隘中牢若絙纜晨輝照耀光燄燁虎豹麋鹿間觸其網蜘蛛益吐絲如縞霞縷糾卒不可脫俟其斃腐乃就食之舶人欲樵蘇者率百十其徒束炬而往遇絲輒燃紅遍山谷如設庭燎蜘蛛清愈邃密惟恐其及也或云取其皮為履不航而涉豈其然歟

螳螂

齊莊公出獵有螳螂舉足將搏其輪問其御曰此何蟲也御曰此是螳螂也其為虫知進而不知退不量力而輕就敵莊公曰以為人必為天下勇士矣於是

迴車避之而勇士歸之見韓詩外傳

叩頭蟲

霍小玉傳有叩頭蟲按異苑曰有小蟲形色如大豆
呪令叩頭又使吐血皆如所教然後請放稽顙輒七
十而有聲傳咸有叩頭蟲賦見柰苑庖言

蟭

蟲名蟭奴於絲髮上自經而死故蟭傍猶益蟭一名
縊女物性固有如此者見柰苑庖言

蛤蚧

首如蟾蜍背淺綠色上有土黃地班點若古錦長尺

餘尾絕短其族則守宮刺蜴蜥蜴多居古木竅間其
鳴聲絕大又有十二時亦其類也大者一尺尾長於
身傳云早至暮變十二般色傷人必死愚常獲一枚
閉於籠中玩之止見變黃褐赤黑四色

金蟲

出利州山中蜂體綠色光若金里人取以左婦釵釵
之飾云

金蠶毒

金蠶毒始蜀中近及湖廣閩粵浸多有人或舍去則
謂之嫁金蠶率以黃金釵釵錦段置道左俾他人得

馬鬱林守爲吾言嘗見福清縣有訟遣金蠶毒者縣官治求不得蹤或獻謀取兩刺蝟入捕必獲矣蓋金蠶畏蝟蝟入其家金蠶則不敢動雖匿榻下墻罅果爲兩蝟擒出之亦可駭也

禾蟲

海山當秋成時多禾虫隨潮浮水上如蠶而微紫小民繒以絳布取之盈臚而歸味其可食市之獲利至有爭訟者

蜈蚣蝴蝶

物之瘦者蜈蚣輕者蝴蝶嶺南異物志見有物如蒲

帆過海將到舟競以物擊之破碎墜地視之乃蝴蝶也海人去其翅足稱肉得八十斤噉之極肥美葛洪遐觀賦蜈蚣大者長百步頭如車箱屠裂取肉白如瓠南越志云人者其皮可以鞵鼓其肉爆爲脯美於

牛肉

見宛委餘編

李司徒勉在汴州得異骨一節可爲硯南海時得於海箇云是蜈蚣脊骨

黃蝶

蝴蝶或白或黑或五彩皆具惟黃色一種至秋乃多蓋感金氣也李白詩八月蝴蝶黃深中物理今本改

黃爲來何其淺也白樂天詩亦云秋花紫濛濛秋蝶黃茸茸

蠹化

橘之蠹大如小指首負特角身蹙然類螭螭而青
翳葉仰齧如饑蠶之速不相上下人或振觸之輒奮
角而怒氣色桀驁一旦視之凝然弗食弗動明日復
往則蛻爲蝴蝶矣力_个拘_个其翎未舒襜黑鞬蒼分
朱間黃腹填而脢_音綏纖且長如醉方寤附枝不揚
又明日往則猶薄風露翠綠草樹聳空翅輕瞥然而
去或隱蕙隙或留簷端翩旋軒虛颺曳粉拂甚可愛

也須曳犯蝨網而膠之引絲環纏牢若桎梏人雖甚
怜不可解而縱矣

見唐書
里文集

巨蟻

馬緒謫潮得巨蟻長尺餘鹽漬之歸誇北人

異苑栢謙太元中見有人皆長寸餘被鎧持槊從
塹中出緣機登竈蔣山道士令以沸湯澆所入處
寂不復出因掘之有解許大蟻死在穴中

歌女

蚯蚓長吟地中江東謂之歌女

鈎蛇

先提山有鈎蛇長七八丈尾末有歧蛇在山澗水中以尾鈎岸上人牛食之水傍瘴氣特惡氣中有物不見其形其作有聲中木則折中人則害名曰鬼彈郡有罪人徒之禁防不過十日死也

江中物怪

歲五六月閩滄江中有物黑如霧光如火聲如析木破石觸之則死或云瘴母也文選謂之鬼彈內典謂之禁水此惟江邊有之郡治絕無見順寧府雜志岑樓慎

氏曰鬼彈二字續博物志與雲南一統志不同故併記之以俟識者取正云

蚺蛇

武宗初年嘗宿豹房劉瑾等以蚺蛇油萎其陽是以不入內宮蚺蛇幾年萎如之後十五年幸劉妓甚寵之呼劉娘娘阻幸漸且促回鑾後善終

黃鼠

北方黃鼠穴處各有配匹人掘其穴者見其中作小土窖若床榻之狀則牝牡所居之處也秋時畜黍菽及草木之實以禦冬各爲小窖別而貯之天氣晴和時出坐穴口見人則拱前腋如揖狀卽竄入穴韓孟聯句所謂禮鼠拱而立者是也惟畏地猴地猴形極

小人馴養之縱入其穴則啗黃鼠喙曳而出之味極肥美元朝恒有玉食之獻置官守其處

物能復本形者則言化月令鷹化爲鳩則鳩又化爲鷹田鼠化爲鴛則鴛又化爲田鼠其不能復本形者則不言化如腐草爲螢雉爲蜃爵爲蛤皆不言化也

鼠獄鷄碑

丁晦芝田錄序有學慚鼠獄智乏鷄碑之句鼠獄人皆知張湯故事至雞碑宋人引宣室志云元和初裴晉公征吳元濟至境上因發地得石刻有雞未肥酒

未熟語解者曰雞未肥無肉也去肉爲已酒未熟無
水也去水爲酉破賊在已酉後果平蔡是日入城以
爲雞碑用此春謂非也此用戴安道事耳晉書戴逵
慙角時以雞郊汁溲白瓦屑作鄭玄碑又爲文而自
鐫之詞麗器妙時人莫不驚歎丁晦蓋用此鼠獄與
雞碑皆幼年慧解事故以作對爾